

祁縣志卷八

祁縣知縣陳 時編輯

人物一

史稱并州近邊好武多雄傑之士圖經載人物輩出
代不乏人皆有文武全才祁攬恒霍河汾之秀篤產
英豪祁宗關姬晉強弱太真君才係晉宋興亡其卓
卓也夫

朝廷選士文武兼資閭里淑修學行並勵士之有德行
而能文章者類不數覲尚義飭行物躬涉世蓋皆有
足多者若方外莠術苟有可觀列史並傳亦必不沒

祁縣志

卷八 人物

沒也志人物

周

祁奚 見鄉賢

祁午 見鄉賢

解狐 見鄉賢

漢

溫序 見鄉賢

王允 見鄉賢

趙興為上黨太守有善政今入潞安府名宦祠

按趙興府志通志俱不錄前後漢書亦無考今據舊
志載入

溫恢字曼基太原祁人父恕涿郡太守卒恢年十五送喪還鄉一朝盡散家財振施宗族州里高之比之郇越舉孝廉爲廩丘長鄆陵廣川令彭城魯相所在見稱入爲丞相主簿出爲揚州刺史魏武曰甚欲使卿親近顧不如此州事大得無當得蔣濟爲治中邪時濟爲丹陽太守乃遣還州又與張遼樂進曰揚州刺史曉達軍事動靜與其咨議建安二十四年孫權攻合肥恢謂兖州刺史裴潛曰此間雖有賊不足憂而

那蘇志

人物

二

今春米生子孝應軍無有遠備荆州關將驍銳乘利而進必將爲患詔果召潛及豫州刺史呂貢等潛等緩之恢密語潛曰此必襄陽急欲赴之也所以不爲急會者不欲驚動遠衆一二日必有密書促卿進道張遼等又將破名遼等素知王意後召前至卿受其責矣潛遂輕裝速發果被促令遼等尋各見召如恢所策魏初爲侍中出爲魏郡太守遷涼州刺史持節領護羌校尉卒年四十五詔曰恢有柱石之質服事先帝功勤明著及爲朕執事忠於王室故授之以萬

里之任任之以一方之事如何不遂吾甚愍之賜恢
子生爵關內侯恢子六人恭生良儉克讓並知名世
號六龍生早卒爵絕

王凌字彥雲祁人司徒允兄子允遇害凌及兄晨時年
皆少踰城得脫亡命歸鄉里凌舉孝廉爲發干長遇
事當髡魏武曰此子師兄子也願坐亦公耳選驍騎
主簿稍遷至中山太守所在有治辟丞相掾屬魏初
拜散騎常侍出爲兖州刺史從張遼伐吳逆擊吳將
呂範等獲舟船有功封宜城亭侯加建武將軍轉青

祁縣志

卷八

人物

三

州布政施教賞善罰惡甚有綱紀百姓稱之從曹休
至夾石軍失利凌力戰決圍休獲免難徙揚豫州刺
史咸得軍民之歡心始至豫州旌先賢之後求未顯
之士各有條教意義甚美初凌與司馬郎賈逵友善
及臨兗豫繼其名迹正始初爲征東將軍假節都督
揚州諸軍事二年吳全琮逼芍坡爭塘力戰琮退封
南鄉侯邑千三百五十戶遷車騎將軍儀同三司時
凌甥令狐愚以才能爲兖州刺史屯平阿舅甥並典
淮南任凌就遷司空進太尉假節鉞凌愚密協計以

楚王彪有智勇欲迎都許昌凌子廣密諫不從會愚
病卒嘉平三年吳師塞涂水凌欲因此發諸軍表求
討吳不聽凌謀滋甚遣將軍楊宏告兗州刺史黃華
華宏白司馬懿懿軍掩至百尺凌面縛水次至項見
賈逵嗣在水側呼曰賈梁道王凌固忠於魏之社稷
者惟爾有神知之遂飲藥死子廣字公淵有志尚學
行爲尚書第飛臬金虎並才武過人初懿嘗從容問
蔣濟濟曰凌文武俱瞻當今無雙廣等志力有美於
父耳濟退而悔之金虎字明山最知名多技藝人得

其書皆以爲法走太原追軍及之時有飛鳥集桑樹
隨枝低仰舉弓射之卽倒追人乃止不復進廣飛臬
金虎胥被害晉泰始元年詔聽使立後令祭祀不絕
鄉人爲凌立廟麓臺山歲時祀焉禱雨輒應

溫羨字長卿太原祁人漢護羌校尉序之後也祖恢魏
揚州刺史父恭濟南太守兄弟六人並知名號六龍
羨少以朗悟見稱齊王攸辟爲掾遷尚書郎惠帝初
拜豫州刺史入爲散騎常侍累遷尚書齊王冏輔政

以羨攸之故吏意特親之轉吏部尚書問議復張華
官爵論者或以爲非羨駁曰式乾之會張華獨諫上
宰不和不能承風贊善望其指麾從命不亦難乎况
內難不預禮非所任今以華不能廢后與趙盾同貶
責之於義不經通也華竟得追復爵位後從討成都
王穎有勲封大陵縣公邑千八百戶出爲冀州刺史
加後將軍范陽王虓敗於許昌自領冀州牧羨乃避
之惠帝幸長安以羨爲中書令不就還洛陽徵爲中
書監加散騎常侍永嘉初遷左光祿大夫開府領司
尚武安長公主官左光祿大夫

溫嶠

見鄉賢

溫充太原祁人嶠從弟嶠討蘇峻與庾亮相推爲盟主
充言於嶠曰陶征西位重兵彊宜共推之乃遣王愆
期奉侃爲盟主侃以兵下遂平賊

溫放之嶠子嗣始安郡公少歷清官累至給事黃門侍
郎以貧求爲交州許之王述與會稽王賤曰放之溫

嶠之子宜見優異而投之嶺外竊用愕然願遠存周禮近參人情則望實惟允不納放之既至南海甚有威惠將征林邑交阯太守杜寶別駕阮卽不從放以其阻衆誅之勒兵進遂破林邑而還卒於官弟式之新建縣侯散騎常侍

王叡字元德太原祁人仲德兄也果勁有計畧苻氏敗起義兵戰敗南奔晉宋武帝甚知之告以義舉使龔桓元事泄爲元所殺及克建鄴仲德抱叡子方回出候武帝武帝於馬上抱方回與仲德相對號慟追贈

祁縣志

卷八 人物

六

給事中封安復縣侯

宋

王懿字仲德太原祁人漢司徒允弟幽州刺史懋七世孫也祖宏仕石氏父苗仕苻氏皆二千石仲德少沈審有意畧事母甚謹學通陰陽解聲律苻氏敗仲德年十七及兄叡同起義兵與慕容垂戰敗被重創走度河至滑臺復爲翟遼所留後奔泰山晉太元末徙彭城歸王愉愉接遇甚薄因至姑孰與張暢論桓元曰恐不足以濟大事宋武帝結叡使龔元仲德曰天

下事不可不密且兵不貴遲巧元情無遠慮好冒夜
出入今取之止須一夫力耳事泄元德被害身竄走
獲免建鄴平爲鎮軍中兵參軍伐廣固爲前驅戰輒
破之大小二十餘戰盧循寇逼衆議遷都仲德正色
曰妖寇豕突恃我遠征旣聞凱入將自奔散今日投
草莽何以威物此謀若立請從此辭及與循戰左里
仲德功冠諸將封新淦縣侯義熙十二年北伐進征
虜將軍加冀州刺史督前鋒諸軍事檀道濟王鎮惡
劉遵考沈林子朱超石胡藩咸受統焉仲德率龍驤

將軍朱牧寧遠將軍竺靈秀嚴綱等開鉅野入河乃
總衆軍進據潼關長安平爲太尉諮議參軍武帝欲
遷都洛陽仲德曰今暴師經載士有歸心當以建鄴
爲王基遷都宜候文軌大同武帝深納之使衛送姚
泓先還彭城宋初累遷徐州刺史加都督元嘉中同
到彥之北伐進平司寇三軍咸喜而仲德有憂色曰
諸賢不諳北土情僞必墮其計度河及虎牢洛陽不
守彥之欲焚舟步走仲德曰魏師去我猶千里滑臺
尚有強兵若便捨舟士卒必散且當入濟至馬耳谷

口更詳所宜乃回軍沿濟南歷城步上焚舟棄甲還至彭城坐免尋與檀道濟救滑臺糧盡歸九年又爲徐州刺史仲德三臨徐州威德著於彭城進號鎮北大將軍十五年卒諡曰桓子正循嗣仲德兄孫文和景和中爲征北義陽王劉昶府佐昶奔魏部曲皆散獨送之界上昇明中爲巴陵內史斬沈攸之使齊永明中歷青冀兗益四州刺史

王元謨字彥德太原祁人六世祖宏河東太守綿竹侯祖牢徙青州父秀早卒元謨幼而不羣世父韃有知

祁縣志

卷八 人物

八

人鑒常曰此兒氣概高亮有太尉彥雲之風宋武臨徐州辟爲從事史與語異之元嘉中補長沙王義欣鎮軍中兵將軍領汝陰太守每陳北伐之策上嘉之後爲金紫光祿大夫領太常與柳元景等受顧命時朝政多闕元謨以嚴直不容徙青冀二州刺史加都督明帝卽位禮遇甚優以元謨爲大統領水軍南討以脚疾聽乘輿出入尋除大將軍江州刺史副司徒頃之爲左光祿大夫開府儀同三司領護軍遷南豫州刺史加都督年八十一卒諡曰莊子深早卒子續

嗣

王寬元謨子明帝時與兄瞻並爲方伯後瞻坐事而寬位待如舊也泰始初爲隨郡值西方反父元謨在都寬棄郡歸明帝加賞使隨張永討薛安都寬辭以母猶存在西爲賊所執請得西行遂襲破隨郡斬僞太守劉師念拔其母事平明帝嘉之使圖畫寬形建元初爲散騎常侍光祿大夫領前軍將軍永明元年爲太常坐於宅殺牛免官後爲光祿大夫三年卒

南梁

祁縣志

卷八

人物

九

王茂

見鄉賢

王神念太原祁人少好儒術尤明內典仕魏潁川太守與子僧辨據郡歸梁封南城縣侯歷安成武陽宣城內史皆著政績後爲青冀二州刺史神念性剛正所更州郡必禁止淫祠青州東北石鹿山先有神廟祈禱糜費神念令毀撤風俗遂改後徵爲右衛將軍卒官諡曰壯追贈侍中中書令改諡忠公神念少善騎射及老不衰嘗於武帝前手執二刀楯左右交度馭馬往來冠絕羣伍長子遵業太僕卿

王僧辨

見鄉賢

王僧愔僧辨弟位譙州刺史征蕭勃及聞兄死引軍還吳州刺史羊亮密召侯瑱見擒僧愔以名義責瑱因復得奔齊與徐嗣徽等攻陳軍敗竄逸仰天歎曰讐耻不雪未欲身膏野草若精誠有感當得道路誓不受辱人手聞空中催令急去僧愔異之勉力馳進行一里顧向處已有陳人踰越江山僅得歸齊

王顛僧辨子承聖初位侍中陳武帝鎮京口僧辨結廉藺之分且爲第三子顛聘陳武章后所生女顛屢諫不聽後隨王琳入齊爲竟陵郡守齊遣琳鎮壽春將圖江左及陳殺琳顛聞之乃出郡城南登高冢上號哭一慟而絕

祁縣志

卷八

人物

十

後周

王思政

見鄉賢

王慶

見鄉賢

王軌

見鄉賢

隋

王頌

見鄉賢

唐

張道源

見鄉賢

張楚金道源族孫有至行與兄越石皆舉進士州欲獨薦楚金固辭請俱罷都督李勣歎曰士求才行者也既能讓何嫌皆取乎乃並薦之累進刑部侍郎儀鳳初彗見東井上疏陳得失高宗欽納賜物二百段武后時歷秋官尚書爵南陽侯有清概然尚文刻當時亦少之為酷吏所構流死嶺表

溫大雅

見鄉賢

祁縣志

卷八 人物

十一

溫彥博

見鄉賢

溫大有

見鄉賢

溫佶大雅四世孫字輔國以字行安祿山亂往見平原太守顏真卿助為守計李光弼後遇之後居鄴薛嵩薦之朝授大常丞一日謝嵩即去屏處郊野世雅其高節子造

溫造

見鄉賢

溫廷皓廷筠之弟咸通中署徐州觀察使崔彥曾幕府龐勛反以刃脅廷皓使為表求節度使廷皓給曰

聞天子當爲公信宿思之勛喜歸與妻子決明日復見勛索表佑答曰我豈以筆硯事汝耶其速殺我勛熟視笑曰儒生有膽邪吾動衆百萬無一人操檄乎囚之更使周重草表彥曾遇害廷皓亦死詔贈兵部郎中

溫璋造子以蔭累官大理丞陰平吏盜官物而焚帑璋刺得其情擢侍御史賜緋衣遷婺州刺史以政有績賜金紫徙廬宋二州刺史宣州逐鄭薰以爲宣州刺史事旋平就并觀察使擢武寧節度使銀刀軍驕橫

祁縣志

卷八

人物

三

累將姑息而璋政嚴明懼之相率逐璋詔徙邠寧節度歷京兆尹璋素疆幹鉅宿弊豪右懼服加檢校吏部尚書同昌公主薨繫醫親屬三百摩極諫貶振州司馬歎曰生不逢時死烏足惜仰藥死

王珪

見鄉賢

王方翼

見鄉賢

王海賓太原祁人徙華州鄭縣爲太子右衛率豐安軍使開元二年吐蕃寇隴右詔隴右防禦使薛訥率杜寶客郭知運王峻安思順禦之以海賓爲先鋒戰武

階追北至壕口殺其衆進戰長城堡諸將媿其功授
兵顧望海賓戰死大軍乘之斬賊萬七千級獲馬七
萬牛羊四十萬元宗憐其忠贈左金吾大將軍

王忠嗣海賓子父歿於陣忠嗣時年九歲始名訓授尚
輦奉御入見帝伏地號泣帝撫之曰此去病孤也須
壯而將之更賜今名養禁中肅宗爲忠王帝使與游
及長雄毅寡言有武畧上與論兵應對鏗起帝器之
曰後日爾爲良將試守代州別駕信安王禕爲河東
副元帥引爲兵馬使開元二十一年遷左威衛將軍

封清源縣男兼檢校代州都督拜左金吾衛將軍兼
左翼林上將軍河東節度副使兼大同軍使二十八
年以本官兼代州都督充河東節度使明年代韋光
乘爲朔方節度仍權知河東節度事討奚奴皆敗之
其年以田仁琬充河東節度使忠嗣依舊朔方節度
兼靈州都督營木刺蘭山平突厥烏蘇米施可汗築
大同靜邊城併受降振武爲一城天寶四載以功攝
御史大夫充河東節度採訪使進封清源縣公訓練
士馬隨關繕補士樂爲用軍每出名屬長付以兵使

授士卒無遺矢亡鏃之費器甲充物自朔方雲中緣邊數千里當要害地開拓舊城或自創制斥地各數百里自張仁直之後四十餘年忠嗣繼之復罷戰五載持節充西河隴右節度使其月又權知朔方河東節度使事忠嗣佩四將印控制萬里爲唐名將尋遷鴻臚卿餘如故又加金紫光祿大夫以詔問取石城堡方畧忤旨李林甫復陷之貶漢陽太守轉漢東郡太守卒寶應元年追贈兵部尚書

王縉字夏卿本太原祁人後客河中故科目爲蒲州人

祁縣志

卷八 人物

古

少好學與兄維俱以名聞舉草澤文辭清麗科上第歷侍御史武部員外郎權太原少尹佐李光弼以功加憲部侍郎遷兵部史朝義平詔宣慰河北使還拜黃門侍郎同中書門下平章事進侍中持節都統河南淮西山南東道諸節度行營事辭侍中加東都留守歲餘拜河南副元帥省軍資錢四十萬繕營完宮室拜盧龍節度使至幽州委軍於朱希彩乃還會辛雲京卒兼領河東節度讓還河南副元帥東都留守太原將王無縱張奉璋恃功以縉儒者易之不如律

令縉斬以徇諸將股慄再歲還以本官復知政事後
坐事貶括州刺史久之遷太子賓客分司東郡建中
二年卒年八十二

王仲舒

見鄉賢

王重盈祁人重榮兄軍中號毅武歷汾州刺史黃巢度
淮擢陝虢觀察使重榮據河中三遷檢校尚書右僕
射卽拜節度使尋同中書門下平章事重榮遇害軍
中推立重盈留長子珙領陝虢節度使入殺行儒軍
復安昭宗立進太傅兼中書令封琅琊郡王父子兄
弟相繼帥守而從子蘊亦歷官忠武節度使乾寧二
年卒

王重榮

見鄉賢

王珂重榮兄重簡子出繼重榮重盈卒軍中推爲留後
李克用薦之許嗣鎮三鎮兵起詔珂會克用以兵趨
新平又爲邠寧糧料使上旣還加檢校司空爲節度
使克用以女妻之珂親迎太原以李嗣昭助守河中
朱全忠擊楊行密珂與太原鎮定等道請加行密都
統以討全忠全忠怨之劉季述之變珂憤見顏色憂

祁縣志

卷八

人物

五

陳討賊謀既反正首獻方物」甚倚之及李克用兵折全忠乃謂其將張存敬曰珂恃太原侮慢我爾持一繩縛之存敬襲克絳晉以何緡戍之進攻珂全忠率師繼進卽劾珂交搆克用爲方鎮生事不可赦珂乞師太原爲緡所迮不能進珂急使妻遺克用書曰賊攻我朝夕見俘乞食大梁矣克用答曰道且斷往救必俱亡不如歸朝廷珂窮遣使告李茂貞曰上初反正詔藩鎮無相侵而朱公不顧約以攻敝邑敝邑亡則邠岐非君所保宜與華州韓公出精銳固潼關

以張兵勢茂貞不答珂益蹙會橋毀潛具舟將遁夜諭守兵無言爲用者牙將劉訓言宜行成以緩敵珂然之明日登城語存敬曰君姑退舍須朱公至吾自聽命乃執太原諸將并奉節印內存敬軍豎大幡城上遣兄璘與諸將樊洪見存敬敬解圍而戍以兵全忠王出也始事重榮約爲甥舅指日月曰我得志凡王氏者皆事之至是自洛至過重榮墓僞哭而祭次虞鄉珂欲面縛牽羊以見全忠報曰舅之恩無日可忘君若以面縛禮見黃泉其謂我何珂出迎握手泣

下駢轡以入居旬日舉珂室徙於汴後令入覲遣人賊之於華州自重榮傳珂凡二十年

宋

王祚并州祁人初爲郡小吏有心計從晉祖入洛掌鹽鐵案以母老解職歸漢祖鎮并門統行營兵拒契丹委祚經度芻粟卽位擢爲三司副使歷周爲隨州刺史漢法禁牛革輦送京師遇暑雨多腐壞祚請班鎧甲之式於諸州令裁之以輸民甚便之移刺商州以俸錢募人開大秦山岩梯路行旅感其惠顯德初置

祁縣志

卷八

人物

七

華州節度以祚爲刺史未幾改鎮潁州均部內租稅補實流徙以出舊籍州境舊有通商渠距淮三百里歲久湮塞祚疏導之遂通舟楫郡無水患歷鄭州團練使宋初升宿州爲防禦以祚爲使課民鑿井修火備築城北隄以禦水災因求致政至闕下拜左領軍衛上將軍致仕

王溥字齊物祚子漢乾祐中舉進士甲科爲秘書郎時李守貞據河中趙思綰反京兆王景崇反鳳翔周祖將兵討之溥爲從事河中平得賊中文書多朝貴

及藩鎮相交結語周祖籍其名將按之溥諫曰魑魅之形伺夜而出日月既照氛沴自消願一切焚之以安反側周祖從之師還遷太常丞從周祖鎮鄴廣順初授左諫議大夫樞密直學士二年遷中書舍人翰林學士三年加戶部侍郎改端明殿學士周祖疾革召學士草制以溥爲中書侍郎平章事宣制畢周祖曰吾無憂矣卽日崩世宗將親征澤潞馮道力諫止溥獨贊成之凱還加兼禮部尚書監修國史世宗嘗從容問溥曰漢相李崧以蠟書與契丹猶有記其詞

者信有之耶溥曰崧爲大臣設有此謀肯輕示外人蓋蘇逢吉誣之耳世宗始悟詔贈其官世宗將討秦鳳求帥於溥溥薦向拱事乎世宗因宴酌酒賜溥曰爲吾擇帥成邊功者卿也從乎壽春制加階爵顯德四年丁外艱起復表四上乞終喪世宗大怒宰相范質奏解之溥懼入謝六年夏命參知樞密院事恭帝嗣位加右僕射是冬表請修世宗實錄遂奏史館修撰都官郎中知制誥扈蒙右司員外郎知制誥張淡左拾遺王格直史館左拾遺董淳同加修纂從之宋

初進位司空罷叅知樞密院乾德二年罷爲太子太保舊制一品班於臺省之後太祖因見溥謂左右曰溥舊相當寵異之卽令分臺省班於東西遂爲定制五年丁內艱服闋加太子太傅開寶二年遷太子太師中謝日太祖顧左右曰溥十年作相三遷一品福履之盛近世未見其比太平興國初封祁國公七年八月卒年六十一輟朝二日贈侍中謚文獻溥性寬厚美風度好汲引後進其所薦至顯位者甚衆溥好學手不釋卷嘗集蘇冕會要及崔鉉續會要補其闕

漏爲百卷曰唐會要又采朱梁至周爲三十卷曰五代會要有集二十卷箋陳搏指元篇八十一章子貽孫貽正貽慶貽序貽正至國子博士貽慶比部郎中貽序景德二年進士後改名貽矩至司封員外郎貽正子克明尚太宗女鄭國長公主改名貽永令與其父同行見外戚傳

三貽永字季長溥之孫也性清慎寡言頗通書不好聲技初生十餘歲時其舅魏咸信見而奇之曰後當類我咸平中尚鄭國公主授右衛將軍駙馬都尉從封

泰山領高州刺史再遷右監門衛大將軍獎州團練使求外補得知單州真宗戒之曰和衆靜治卿所當先也真拜洛州團練使徙徐州河決滑州徐大水貽永作隄城南以禦之改衛州團練使遷懷州防禦使知澶定二州徙成德軍會有告曹汭變者貽永奏治之遷耀州觀察使復知澶州歷彰化武定軍節度使觀察留後拜安德軍節度使出知天雄軍徙保寧軍節度使知鄆州州自咸平中徙城而故治爲通衢介梁山春夏多水患貽永相度地勢爲築東西道三十

餘里民便之復徙定州又徙成德軍擢同知樞密院事改副使加宣徽南院使進樞密院使久之拜同中書門下平章事遂加兼侍中徙節鎮海以疾求罷手詔撫諭遣上醫診視帝臨問頒尚方珍藥手取糜粥飲之貽永自言寵祿過盛願罷樞筦解使相還第帝冀其愈也乃聽罷侍中徙彰德節度使同平章事樞密使如故疾稍間入見命其子道卿掖登垂拱殿仍賜五日一朝遇朝參起居許休於殿側至和初復以疾辭拜尚書右僕射檢校太師兼侍中景靈宮使卒

贈太師中書令謚康靖當時無外姻輔政者貽永能
遠權勢在樞密十五年迄無過失人稱其謙靜子道
卿西上閣門使

金

溫昉歷官工部尚書

元

程日新歷官禮部尚書謚簡肅

程邦彥為汾州同知循理持身奉公守法郡人為立遺

愛碑又詩賦草隸俱工人稱三絕

祁縣志

卷八 人物

三

明

李瓚 見鄉賢

古鏞 見鄉賢

閻睿 見鄉賢

王佑 見鄉賢

戴賓 見鄉賢

李熹 見鄉賢

戴光啟 見鄉賢

李自問 見鄉賢

戴運昌

見鄉賢

國朝

陳璵字仲玉三合村人年十八爲諸生家貧硯耕自給勤於講讀孜孜不怠乾隆庚午舉於鄉丁丑成進士爲人孝友剛正自持不事干請邑令馮延爲書院山長訓課有方擢科者前後十餘人遊庠食餼者益衆其子之儒亦以乾隆乙酉科領鄉薦嘗於書齋自叙礪節砥行一則生平行誼適如所言識者謂爲言行之相顧云乾隆戊子任四川璧山縣知縣甫下車卽

祁縣志

卷八

人物

三

建置縉雲書院不數月以走失流犯被議解任邑人欽其學行卽以公所建之書院奉爲山長未幾卒邑人思之爲之立祠焉

程愨字中孚伯父奇畧康熙癸丑進士愨師事焉康熙丁酉愨舉於鄉乾隆十年任直隸容城知縣值水災捐俸賑濟民賴以安容城壤接新安舊有四公閘古河一道下有盛水官潭一片不下數十百頃在新安境爲新安兵役占種強閉閘口大雨連日積水橫流故容邑受害愨因相度地勢開閘放水隨申請上官

臨開勘驗盛水官潭曲直立判四開以時啟閉建立
石碑永杜爭端容城遂無水患捐金爲楊忠愍公修
整祠堂置祀田百畝建立義學延師訓課多所成就
以卓異調東光知縣年老致仕足迹不至公庭邑令
楊舉爲鄉飲正賓享年七十有九